

摘藻堂四庫全書薈要

集部

欽定四庫全書薈要

集部

御選宋詩卷二十二

詳校官原任主事_臣李斯咏



欽定四庫全書薈要卷一萬八千三百二十九

具部

御選宋詩卷二十二

五言古詩十三

黃幹

答曾伯玉借長編

白露下百草迅商薄修林幽人起長嘆感此節物深攬
衣自徘徊撫劒還悲吟丈夫各有志莫作兒女心涉遠
當疾趨畏影須就陰願言理輕車去上南山岑



九日早發桃枝嶺

登山豈不樂况此風露清排簷夜雨滴詰旦天空明歡
然金石交要我林泉盟支筇趁汗漫勇往不計程一水
何縈紆千峰鬱崢嶸仰視流雲馳俯聽幽壑鳴班荆得
所適斗酒聊共傾人生會有累聚散如浮萍今晨諧勝
遊異日難忘情意愜各賦詩庶以紀此行

道間觀瀑布

行行益以遠愜此心期幽一徑險復夷千林密相樛回

首天際山矗面懸飛流銀潢倚石壁玉龍下山秋光搖
日璀璨勢激風颺颺可望不可親神往形獨留眷言桃
枝山久懷卜築謀豈無一日閒努力窮冥搜

侍文公飲浮翠用劉叔通韻

涼風振幽壑陰雲翳前山高懷勵清秋適意林莽間煙
橫萬家井水淨雙溪灣徙倚暮忘歸人境相與閒遊子
獨何為千里方言還陪此杖屨遊忘彼道路艱心期更
他歲依巖結柴關

與胡伯履

白露下百草玄雲翳崇岡遊子暮何之
倏若孤雁翔朝發長沙渚夕息湘山陽
飛鳴念傳侶慷慨增悲傷故人懷我深
遠寄金玉章開緘且疾讀慰此飢渴腸
是時日中火朔風埽枯黃歲月能幾何
阜蘭結微霜脂車策良馬日暮道正長
徒僕審驅馳前途畏榛荒劣質苦難任
白雲懷故鄉南山一舍隔矯首空西望

送章元德司理罷官歸永嘉

送君北門坂遙望東甌路
峩峩白鶴嶺渺渺飛鸞渡
上有虎豹嗥下有蛟龍怒
車馬堅且長維楫夙已具
褰裳涉其險萬怪不足懼
世路劇羊腸皦皦誠易汙
但能心無愧窮達安所遇
毋為婉孌者暫蹶輒驚顧
生平麋鹿姿處世歎多忤
胡為展良覲握手便如故
高懷發鍼石正論諧韶濩
情親復告別欲語誰與晤
乾坤一逆旅日月雙脫兔
寒儒守蓬葦白首困章句
期君以遠大庶足慰遲暮

慶元己未冬至前二日訪林公度至栗山翌日
同訪吳必大林季亨容之偕行愛其溪山池亭
之勝為之賦詩

篝火下修嶺褰衣涉清川夜投故人廬洞壑藏真仙一
水遠縈紆兩山對蜿蜒但見煙雲深不識車馬喧主人
敬客至杯酒羅堂前諸孫競勸酬烹羊雜雞鮮同來二
三友妙語爭春妍此會良獨難達旦不復眠雞鳴秉燭
遊到君新池邊中有讀書堂藏書更精研把筆紀姓名

徘徊悵無緣
天明驅車去
去上層岡
顛回首
三歎息
安得數畝田
結茅與君鄰
嘯傲終殘年

詹初

出心原

心原在流塘南

行行陟南原
遙望北山岑
上有千尺崖
下有高樹林
高林轉幽隩
夏然啼雙禽
流水自迅逝
白雲澹無心
策杖者誰子
閒來坐春陰
相逢籜林下
攜手溪水濱
對之兩無言
悠然鳴素琴
素琴清且越
暢以披沖襟
沖襟良自

爾那知春已深

林亦之

偕李監倉宿龍臥山中聽雨旋復月出

相喚此山來狂風吹我衣把酒桂花下山雲片段飛掩
門雨初滴開門月旋上倚樹看月明半山聞雨響人間
有佳景詩句頗發越何曾似今夕聽雨還看月

和李監倉欲遊龍臥山以海風大作不果往

枉蒙龍臥篇如睹藤蘿境十年招隱士欲到此山頂坐

石誦離騷掬水弄清影無人同荷鉏長愧林下景昨者
逢李侯一笑便驩領為言有明月公事且暫屏騎驢學
賈島捫蝨喚王猛雙鑣雲外來斜帽不須整夜投招提
宿聽雨寒更永論文到昌黎說詩笑匡鼎問人數日風
何時發深省

陳藻

李氏園

開方數畝地委曲多門牆咫尺闌闔間縈帶溪山傍入

巷見顏子簞瓢想淒涼變化若夢中忽成摩詰莊主人
華副實好遊心不荒引水灌花木築場收稻梁六月無
暑氣池臺足徜徉日斜留客浴清淨如寶坊洄洄過天
象豔豔流坤光暫來吟未到留歸作者囊

樓鑰

題孟東野聽琴圖因次其韻

誰歟住前溪夜深以琴鳴天高豪氣肅月斜映疎星
林助蕭瑟泉聲激琮琤彈者人定佳能使東野聽東帶

不立朝遙夜甘空庭龍眠發妙思神交窮杳冥不見彈
琴人畫出琴外聲郊寒凜如對作詩太瘦生恨不從之
遊撫卷空含情

月夜汎舟姚江

秋暑不可耐幾思汎中川晚來興有適溪船偶及門涼
月纔上弦平潮可黃昏倚楫縱所如臥看龍泉山長虹
跨空闊過之凜生寒坐穩興益佳夜氣方漫漫草蟲鳴
東西飛鳥相與還仰頭數明星垂手搖碧瀾坐客惜此

景不及攜清樽無酒要不惡徜徉足幽歡幽歡有何好
叩舷澹無言

宿佛日山

平生臨平山知誦藕花句輕帆幾來往山色澹如故寧
知千萬峰中間著佳趣蕭蕭蒼髯翁為指化城路我來
春正濃天寒日將暮雲深鐘唄鳴自喜得勝具緬懷玉
局仙老筆埽朝霧玉塑儼相持珠旒竟何所惟餘渥洼
水蒼龍角牙露人間翻覆手烈日變煙雨俗子眩炎涼

三四錯賦茅道人笑視之萬化隨所寓深坐十笏地一
息了千慮箇中誰得知幽鳥背人去

游初暘谷及白巖

重來游仙都止欲訪獨峰寧知一峰外佳境無終窮何
處潁川子鏡巖便相逢約我遊白巖輕舟借溪翁齋餘
尋宿諾秋霽波溶溶清澈見石底鑿刻驚神工昨登初
暘谷但見石嵌空茲浮懸崖下萬石森龍從上有勝絕
地古語留郭公鬼神謹呵護雷霆掃塵踪換船到白巖

修篁搖清風縈回進石屋孤竹攢沙蜂洞府仙所闕無
由辨西東扣舷過巖下數仞如崇墉石趾平如甃竒怪
遮蒼穹更尋小蓬萊俯瞰馮夷宮篙師進深窈捫蘿捨
枯筇遊子非不多無人解從容我因一日留幽尋極山
中秋旻快排蕩日暖如春融歸坐獨峰下石影橫空濛
急呼醺醪清澆此磊魄胸幸有濟勝具未能上金龍為
君揮五絃決皆送飛鴻

送制帥林和叔歸

使君一何清鶴骨天與瘦少年場屋聲六藝飽芳漱一
行起作吏所立已不苟立朝凜大節論事幾及雷發言
必體國平生無矯揉藜藿為不採風采照宇宙出入有
本末眼見凡三就來不為苟合薦名乃結綬去亦不好
高三宿徐出畫天官豈不貴陳義堅素守贛川嘗報政
復來守鄞鄮不求赫赫名實出龔黃右情偽千萬端到
眼輒空透撫民過嬰兒問里息爭鬪奸胥及強使時用
霹靂手人誦南山判情通理亦究六邑俱帖靜稱贊不

容口律身至嚴冷無能掣吾肘吏事精且勤呼燭侵夜
漏公退入家塾諸孫後來秀吏卒不識面洛誦出窗牖
幾年南塘路來往困彊仆一朝平似掌行歌紛老幼公
心信如水古井波不皺榮觀處超然軒冕亦何有翩翩
欲賦歸排雲屢騰奏廟論終不許斯民方借寇上心重
閔勞祠官向廬阜闔境極攀戀人人懷杜母君看臥轍
人誰能使奔走挽須不得留百拜願公壽我老幸同朝
傾蓋已如舊聯事東西省交情久益厚我歸公亦來門

戶託雲覆黃堂間參語惟我甥與舅揚旌鳴鼓吹賁此
蓬華陋清談不及私翁歸况不受義命孰不知踐履或
差謬惟公見善明力行真耐久有時相與言心同蘭芷
臭摻祛寧忍別追送列觴豆公雖不好飲勉為飲醇酎
公去我亦隱菽水翻綵袖花溪渺何許望望幾雙堠千
里共月明懷人重搔首惟應折梅花臨風為三嗅

葉適

馮公嶺

馮公此山民昔開此山居屈盤五十里陟降皆林廬公
今去不存耕鑿自有餘風篁生谷隧雨茄來巖虛人隨
亂雲入咫尺聲相呼四時花木香異類果藪腴採薪得
崖花結綴成襟裾此亦佳窟宅可對幽人娛何必種桃
源始入仙者圖甌閩兩邦士洵洵日夜趨辛勤起芒屨
邂逅乘輪車山人老白首名氏不見書我獨何為者拊
身念居諸

陳同甫抱膝齋

昔人但抱膝將軍擁和鑿徒知許國易未信藏身難功
雖愆歲晚譽已塞世間今人但抱膝流俗忌長歎儒書
所不傳羣士欲焚刪譏訶致囚箠一飯不得安珠玉無
先容松柏有後艱內窺深深息仰視冥冥翰勿要兩髀
消且令四體胖徘徊重徘徊夜雪埋前山

送鄭虞任赴京西檢法官

春風逝無涯夏潦生未已思君溯江漢行銳業難止事
繁絲唾亂神靜魚鱗理前年浙東幕借助獲專美邊頭

值閒暇人物盛儲峙荒村魚米場孤成花藥市雅知足
禪味翫世失憂喜但疑柳上白時雜髯間紫豈非久不
遇感歎妨隱几回首舊隆中畦壟長蕤蕤

奉賦德修西充大夫成都新園詠歸堂

浣花炫春溼濯錦絢晴浦成都信繁會此水工媚媿豈
無濠上亭感步難仰俯誓言違市朝卜宅近幽阻沃沃
葵莧畦焰焰棠杏塢朝曦濕淺瀨暮色生遠渚循涯詠
未厭引流絡其圃蘋荇依籬樊鳧雁宿庭戶長松百里

外物象爭渺莽時平乏隱淪衰筮自歌舞岷江忘東向
激射走吳楚胡為滯淫之習坎聖所許

送戴料院

質如金石堅文比錦繡新利錐亦穎透大樸終還淳憶
昨慨其離早合儀朝紳於今悄復去奈何猶選人西風
管搖落黃菊別有春茫茫九衢內白汗沾紅塵誰拋連
城富却買徑寸珍世路豈云極念子行李頻

送楊通判

花稀讓林稠，苗疎與田遠。共欣永日寬，更笑餘寒褊。窮
閤多樂事，粲粲翠幄展。惜君盍少假，忽汎江流緬。三年
綱紀地，一意圭玉琬。矍儒道義深，傲吏威稜淺。山鞋蠟
已就，畫筆枯未吮。不上雁蕩峰，何由寄高蹇。

自羅浮行田宿華嚴寺

浮山昔飛至，與羅合其巔。嚴冬樹色改，青松耀紅鶻。不
種自生植，屢伐常蒼然。我病不暇耕，行復觀我田。呼扶
偃蹇後，倩護龍鍾先。僮客四面集，畦疇相勾連。敢云歲

晏休翻犁趁晴暄
民政今古殊
憂樂豈異源
收身臥荒
刹朗月前夜
圓鵲懶附枝
靜廳飢嗅牀
穿為農悔不早
時發棹歌旋

高似孫

入餘杭縣

明發遵西陸
驅車月流光
佳山迎車來
知是古餘杭
危樹露如雨
平野日未陽
支流瀟清原
弱羽無高翔
人家叢灌下
世載山水鄉
扣門作午憩
白飯羞文魴
邂逅有

暫歡離合非其常主人不余鄙余亦留徜徉

憩昌化民家

晚程息勞轍白日流西輝水鳥得魚去耘夫荷鋤歸川
原杳芊絲林野雜依霏一來扣竹館相邀到荆扉重巖
吐清溜澄陰有殘馱曰予考此室十載相因依左右桑
果足歲月雞豚肥豐猶未至裕歉亦無能饑予聞良自
愜欲謀北山薇有田可同耕有蠶當共衣車夫猝無情
此志仍重違

裘萬頃

行役

宿霧鎖山椒
落月挂林側
崎嶇歷岡巒
鬢髮辨阡陌
秋高風露寒
道遠時序迫
安得歸故園
篝燈理書冊

羅溪橋

我來從西昌
日日困塵土
誰知羅溪橋
淨若初過雨
長松列左右
清風奏宮羽
薄暮舍籃輿
扁舟渡溪去

出門

出門復入門吾行竟安之攜書北窗下翻閱聊自怡有
懷千載人掩卷還歔歔采采首陽薇戀戀商山芝一裘
或終身欣然釣江湄斯人不可作斯道日湮微目前稻
粱謀鳧雁方齊飛青田寂無音歲晚將疇依慎勿出門
去塵埃染人衣

劉宰

送傅守伯成歸十首

錄二首

煩暑斂清曉西風生遠林客懷感素秋歸夢越千岑祖

帳城南門藹藹萃華簪舉觴忽有贈去矣無遐心
北渚有狂士病臥忘四時綠暗知春晚葉落識秋期西
風日已高凝露方自滋獨有歲寒心不負流水知

送梁伯賜歸括蒼

怒風駕海潮錢塘天下壯岷山浚源委東下極奔放中
橫吳淞江煙波渺四望歸歟太史筆偃蹇九霜上

題王荆公半山圖

歸來心事平蹇驢踏秋風舉鞭問髯奴何如浣花翁道

旁幾高松風來自相語桃李今何之歲寒子與汝

碧雲即事

唧唧秋蛩鳴耿耿秋夜長簡編負初心枕簟怯新涼朝
曦入疎牖宿雲散前岡歸與一葉舟浩歌放滄浪

章倉席上

官舍若幽居四圍山水綠中有超詣士簿書厭拘束
邂逅文字飲交契如金玉朱絃發清音紋楸理新局
一杯復一杯夜闌更秉燭木落天宇寬蟹肥酒初熟相期壯

觀遊憑高重送目勿令兒曹知此味我所獨

漫塘晚望

遠山亞歸雲黯淡與天一近山過餘雨淨埽峰已出式
喜鳩喚婦寧憂月離畢擔簦彼誰子蹇步泥沒膝舉頭
望天末一笑失愁疾應知扶桑東明朝浴晴日

崇禧夜坐

淮浙千萬山茲山鍾秀異山中四時好雪景更佳耳危
登俯八荒豈無超詣士春遊眩紅紫秋賞挹蒼翠衝寒

縹冰崖問訊世能幾山神出竒觀似慰遠來意漫空飛
六花匝地掩蕪穢頗疑羣王府飄墮人間世又疑姑射
仙與物洗疵癘意行輒有得曠望了無際便欲呼雲車
御風駕六氣舉酒酌初平逍遙聊卒歲

因石令君行有感成古詩一章呈丞尉二丈不
知退之亦肯效孟郊樊宗師以文滑稽否

絕代有佳人絜齊處深宮組織成文章黼黻可帝躬蘭
菊媚幽姿桃李自春風出門非所識所識非所從婉孌

彼誰女翦製了不工膏沐倚市門苟為悅已容顧盼若
有得芻蕘靡不同出門惟所之諧笑繚西東寄語道傍
人取舍須至公容華一時耳禮義百年中

喜雨東權邑蔡丞

高槐障午暑巨竹搖清風中郎百世英一官此從容心
事付溟鷗年光占候蟲客來欲有言一笑撫雙松曰余
不負丞哦詩有新工天意亦憐才要施及物功適此歲
游饑旱氣日蘊隆雨應長官祈猶未周四封雁鷺抱文

書朋來立庭中公曰早既甚此理貴感通絜齊走羣望
精意格蒼穹西山殷其雷萬疊聳雲峰南湖飛霹靂彷彿
追蛟龍斯須天壤間萬象俱晦蒙飛湍連日夜一洗
早魃空樹藝走丁壯謹呼沸兒童歲功已權輿餘閒清
鋤筍行歌何所云丞哉寧負公

送胡伯量

我本山澤人飄然如野鶴夫君九臯來氣類頗相若相
逢宿不再別去天一角君從浮丘來度世得良藥渴飲

瑤池水饑向芝田啄引脰試一鳴羣仙相唯諾嗟余侶
鷗鷺迴翔一丘壑刺天見羣飛老氣鼓不作客來傳好
音重會欣有約追隨忽幾月至哉天下樂亦知仙凡異
所向終落落分飛又茲始後會杳難度歸從浮丘侶為
我試商略雖愧毛骨凡頗亦志念懇願乞刀圭劑一洗
性塵濁從君清都遊共聽鈞天樂

崔與之

陳祕書分符星渚同舍餞別用杜甫老手便劇

郡之句分韻賦詩得老字

天生一代奇人瑞國之寶少游翰墨場聲譽日杲杲
胸三萬卷致君應有道懷璧掩其光幾書州縣考翩翩
鳳新雛飛上羣玉島郎星粲光躔同舍未為老自詭乘
一障決計何太早分以星子符廬阜足幽討榮途競奔
逐砥柱迴瀾倒自顧孤危蹤歸意尤浩浩白頭頻送客
何以慰離抱江頭潮正平西風一帆好

劉過

古意席上為徐子宜侍郎賦

桃李多芳妍開落如春風託身終自天花不百日紅殘
月望朝日各自相西東為君整儀容照水不照鏡為君
進甘旨君自內有董悲歌欲感君聲若君不聞金玉徒
結君君看若浮雲父母長歎息謂兒好容德脂澤固不
妍珠翠亦無色娉婷豔陽春自醜不自惜君心河漢流
為雨不復收妾心東流水赴海終不止

汪莘

春懷

太皞涵帝德，勾芒播皇仁。羣龍服蒼駕，靈雨冒南岑。淵
魚自暖躍，谷鳥相和吟。桃花既夾道，麥苗亦成林。竹籬
帶夕陽，茅舍含清陰。白蘋空騁望，青楓第傷心。况值聖
明代，聊以陶我真。寄言同懷子，芳醪期共斟。

神遊何邊方，夢到迷處所。論世非秦漢，辨地豈吳楚。碧
桃翳陽林，翠霞陰清渚。鷓鴣鳴花間，鸞鶴將儔侶。中有
古玉堂，日月光相貯。似是重瞳君，左右列二女。我時再

拜興帝復相爾汝遽然形神開不得竟所語

夕陽下西崦明月出東方清波如有神喬木何蒼蒼簪
玉待魏文跋履從思王奎壁不在天西園爛成章祥飈
遠飛蓋鴛鴦宿春塘絲竹壯高會賓主無留觴憂生惜
日短翫物貪夜長歲寒不易得此道亦足臧

夾鍾應和氣和氣到天中半為枝間綠半作水上紅杖
策南野際鶴鶴摩蒼穹君子有本性不受外物攻那能
學攀桂俯首嫦娥宮竦身躡倒景與子凌罡風參旗一

以展櫬槍避其鋒舉瓢酌雲漿歌詩謝鴻濛

日釀天正綠風酣麥方秋閒攜稚子輩眷言共春游芒
鞋過澗壑竹杖穿林丘東西隨所適語嘿頗自由亦有
一樽酒父子相獻酬山花既含笑野草亦忘憂一輪漸
隱隱半規尚悠悠歸路何所歎古人可與謀

曳杖登春臺萬物含光輝天地豈不大孤雲獨無依我
友在東海古屋絃湘妃昔醉芙蓉浦今掩桃李扉不見
已三年何由會王畿贈子青玉案報我紫金鞵日暗牛

羊下月明烏鵲飛有生共如此擾擾徒增歎

陋居五詠

錄二首

景風院

昔年浮丘人池館藏一丘天門騎鹿仙浩氣壓女牛
朅來木正落歌動林塘幽至今五月花憔悴因郎羞底處
牽白犢超然對清流景風故隨車為我迴涼秋

竹澗

散髮篁竹中濯足寒澗流太陽正徘徊心與爽氣游活

活走龍鱗鏘鏘韻天球於焉種荷花遙剪西湖秋亦思
百頃綠薰風木蘭舟青鳥去還來白魚沈更浮竹澗魚
鳥家益覺吾廬幽

陳淳

名陳憲友清齋

并序

陳憲于仁智堂之西結小軒植梅竹求名因以友
清命之而述其意云

名軒何以清惟有梅與竹梅清清且白竹清清且綠雪

藥破清灑霜操挺清肅至哉雙友清格韻真寒玉伊誰
與之友相對淡無欲清心仁智翁妙趣於中足

杜旃

白雲在南山

白雲在南山幽鳥乘風飛鳥飛不能遠雲高還難依園
中亦有菊堂後那無萱遊子不得歸銜悲欲何言

同平父園中即事

季冬少寒凜霜薄日色明訪我會心友相攜園中行菜

甲長疎花梅枝綴初英潛魚戲晴波寒雀暖有聲小步
極遐覽閒吟暢幽情語言接繾綣意適體自輕歲華晚
更好景趣靜始并俯仰物態間聊與共春榮

岳珂

予園泰堂之傍有奇石石小有洞箭括有門車
箱有谷高廣雖不袤丈而嵌空之勢宛若飄動
暇日獨坐對翫移晷因賦

池邊歷平蹊果下動浮鞵一笑未心領萬象徒目送淵

淳歷危楹日景眩華棟閒情晦不舒倦思悄如夢忽驚
鵲噪蒼悅類雞發甕坐開蒼玉壁平揖青瑤峒疇昔果
安在奔走比獄貢仰觀箭括門廣宇豁晴霽右開車箱
谷盤道陟微衙中天隱日月遙海插蟠螭居然袤丈間
有此具美衆老夫生平嗜酷好泉石弄天巧謝斲削人
為謾搏控尚憶三神遊俛紀十年夢踞龜會得蛤騎鶴
更答鳳覺來山海蒼倏見雪竇空便疑勢酋卒獨欠波
瀕洞捧罌喜對酌岸幘發孤諷此兄定絕竒吾意當折

東一笑問阿章試與評伯仲

劉仙倫

中秋有懷

吾廬有寒梅老幹秋風多
上有雙棲鳥夜月聽我歌
一別三載強梅影應婆婆
烏今來不來奈此明月何

梅樹秋

誰將和羹姿植彼江之墳
老葉纔晚柯生意覺已欣
寒流帶孤標淡月寄一痕
莫作搖落看下有春風根

教陶孫

佳人珮明月贈俞德章

佳人珮明月笑語含春姿
手握幽蘭叢照影清漢濱
少年冶遊子行樂方及時
折苕戲相贈玉色頰自持
歸來種白壁日漚文錦絲
加幣欲聘君常恐歲月遲
終然不可諧翕歛聽所之
願言遺薌澤遠慰千里思

大風懷林伯農

江湖易高風六月寒
痒痒中宵會急雨涼意到衾枕
願

披蒲葦亂抑壓烏鳶噤禾頭欲生耳樹背各流瀦不謂
哺來霞橫拖半天錦初疑鴉翻晴旋覺虹投飲晦明信
難料暘霽吾誰論所思隔江水筆力望徐沈十年一葛
衣時見尚整衽想當風雨夕憂國願歲稔淒涼新豐邸
避濕幾違寢何由語連牀共破秋氣凜

趙師秀

和陳水雲湖莊韻

粼粼水增波疊疊雲弄影昔誇春徑妍今愛秋塘靜芳

筵集賓彥清宴除豔靚時當新雨餘蒼翠獻林嶺既忻
冲抱舒復快遠目騁仰嘉鍾鼎人而乃眷箕穎深營察
高趣雅詠發沈景獨使和者難一夕愁欲瘦

翁卷

和陳待制秋日湖樓宴集

一夕鳴雨來秋容變俄頃湖山屬初霽風煙帶微冷侍
臣設芳筵開樓翫澄景懷我林下人招攜共觀省碧草
鋪近洲白雲冒遙嶺依稀蘭杜香彷彿瀟湘淨撫化篇

忽成達生累全屏即是造物游何必神仙境

思遠客

涉夏思已深感秋念愈迫思念皆為誰為彼遠行客客
行曷辰休悵望朝復夕出門虛有待命駕焉所適邈邈
阻前歡悠悠抱今戚中庭一株橘嘉實轉金碧爰憶花
開時花邊語離析惜此不忍餐留之候君摘擬君君未
來回腸更如折何當乘夢時儻遂薇容覲

酬友人

常憂別時數每苦歡事疎矧茲同心人契闊三月餘昨
日攜瘦藤往訪林間廬差池不一見出門恨何如今晨
蒼童來贈言委璫璵吟翫弗忍釋絢彩搖襟裾子有供
世才胡為未展舒我無資身策合守貧賤居積疴困疲
繭焉得愁悶除殷勤荷久要尚肯念到予南枝早梅白
古澗寒流虛明當復相尋行游帶琴書嚼花飲芳泉哦
詩更躊躇

題林遂之真意亭

結亭納虛豁，雀鬼進南山。南山有佳致，白雲多往還。繁
英粲秋籬，幽芳復相關。濁醪對之飲，超此神慮閒。至樂
豈外求，妙象非言間。邈哉靖節風，千載君能攀。

徐照

未迴車

山川匪遙遠，行人未迴車。欲語昨宵夢，忽接今朝書。啼
鳥在屋上，綠草生庭除。仰看日月光，照知子衿裾。

徐璣

述夢寄趙靈秀

江水何滔滔渡江相別離
揖子家舍前對子衣披披
問子何所為旅舍未得歸
執手一悲歎驚覺妻與兒
起坐不得省清風在簾幃
平明出南門將以語所知
過子舊家處寒花出疎籬
蕭蕭黃葉多裊裊歸步遲
子去不早還何以慰我思

漳州別王仲言

百草各有種春至不栽培
交情重故知豈論才不才
相

識十年初再見天之涯共飲一杯酒粲若紅顏開人生
有此樂知復能幾回契闊既已深矧爾病與衰朔風從
何來吹發枝上梅天寒日欲暮又乃行色催君去江水
西我歸近天台東西道路長未可心膂摧明朝碧雲多
佇思良徘徊

九月初四日分得然字

去載羈旅身千里望羣賢今夕良燕會况乃佳節前涼
風日已多歲序日已遷春時種叢菊秋花滿籬邊採之

不盈把泛彼清清泉行樂不易得貧賤焉可捐惟當從
爾遊吟哦思陶然

薛師石

寄題趙十四知縣聽雨堂

誰彈石上琴涓涓流水響主人性情曠靜夜逾幽想何
心指蓬閣取近對湫蕩應有可人來煙蓑曳雙漿

潘榿

昔遊詩書後

我行半天下未能到瀟湘君詩如圖畫歷歷記所嘗起
我遠遊興其如鬢毛霜何以舒此懷轉軫絃清商

周文璞

法華小院

偃蓋著地臥清瑤傍渠走散入流觴臺轉若珠曲九淙
淙不知休還赴石鯨口灣環合巨澗橫橋傍蒲柳來看
暮春餘衆綠濃似酒摩挲蘇陳刻愈覺歲月久寺僧愛
光燄捧送貴侯有至今星散居各自開戶牖自棄眠雲

身誰縛釣月手夕陽令我歸為爾重搔首

趙汝錡

荆渚書懷

明鏡明于月白髮白于雪月照雪轉添使我心斷絕連
年事行役曾不須臾歇陟岡脚雙繭凌湖舟一葉五觀
君山面洪濤漲天闊重倚南樓欄遠雁逐雲滅西風落
破帽龍山酬九節搖鞭荆門去蒙泉弄清潔遊觀固不
惡奔走計則拙眠指數千里意行遂休轍困翮墮渚宮

因循入羈紲天涯寒苦早袖穿手龜裂邛沽酒力薄連
醕耳方熱矯首飛白雲杳杳望吳越儒冠信誤身鑄盡
六州鐵

小水寺

披霧入野寺寒林響西風誰遣僧出迎山鳥為我通染
衣松露香照眼巖花紅聊此息塵慮歸騎毋怱怱

題王才叔南館

南館著隱士幽爽似僧舍島紅野花繁岸綠垂楊亞人

行鳥不驚客至鶴先迓林深自無暑月到更宜夜傾樽
對聖賢飛筆追鮑謝興來即散策無時不得暇

訪隱者不遇

兩腋乘西風送我上高岑竹根一泉通石徑萬木森中
有隱者居敗屋苔莓侵山空人不見雲滿挂壁琴兩鶴
出候我逢迎啄衣衿應酬久頗厭走避不可尋誰伴山
下去明月升高林

晚晴與何尹登水亭簡張丞

溪流兩岸秋日落千山暮一亭壓其間登覽洗萬慮胸
襟富丘壑方領此幽趣擲餌來潛鱗圍棋驚過鷺酒壺
展逸興漁唱續遠浦安得哦松來撚髭同覓句

劉學箕

太湖書懷

清風起平湖白雲生澗陰佳時慘不樂羈思苦難任客
子熱中腸浩然懷故林仲夏倏已過草木鬱蕭森萬物
欣有託吾生何崎嶇念昔歲甫冠自許雙南金只今墮

危途不如煙際禽山水所素願利名非宿心何當返故
廬嘯傲蒼崖深兩鬢豈長綠勿枉吳霜侵

晚望

晚雨逆溪上寒雲傍山飛白鷺去洲渚潛魚泝灣磯舉
頭行跡少唯見暮樵歸

溪園

溪園闢平疇左右接林麓沉沉水浮堰汎汎潭轉曲果
木漸成行臺榭亦營築何時東風來吹滿枝上綠

僊洲呈劉伯益沈莊仲

杜門久經時老我徒謬悠平生山水心汨汨不暇謀今
辰定何辰木落風露秋忘懷兩佳士共約來仙洲杖藜
欣躋攀空濛翠煙浮解帶小盤礴尋勝還經丘捫蘿坐
石冷俯澗穿林幽露重巾屨濕涉歷青山頭瀑泉晝生
寒晴雪散不收蜿蜒下大壑一闢千丈虬歸來坐危亭
興與孤雲留野草為誰好巖花徒爾愁昔賢有遺蹤俯
仰歲月流慨歎不自禁陶然聊消憂

葉茵

次潘紫巖虎丘韻

潭深劍氣腥
樹瘦嵐光薄
石壇古即今
藤花開又落
晉士已結廬
吳市猶舞鶴
沉吟發幽懷
人世舟藏壑

魏了翁

登萬象樓和計次陽韻

塵纓羈我身
對景慵着語
青山喚倚欄
壯氣臨頽汝
層雲卷油幕
萬頃眇煙縷
酒闌一橫笛
樓前葉自雨

寄題雅州胥園

胥君欣然來錦囊背奚奴探囊發詩卷一一卿大夫未
識胥園面詩卷是畫圖埽石臥竹影長鋤劔芋區胥君
于此時林前傲金朱懶余本丘壑誤被塵纓縛每逢漫
浪友慚愧紅塵脚會當尋茲盟酬此一大錯

真德秀

登南嶽

煙霞本成癖况復遊名山舉手招白雲欲納懷袖間奇

峰七十二羅列皆蒼顏振衣遇長風浩浩天地寬

司理弟之官岳陽相別於定王臺悽然有感為
賦五言古風二首以餞其行

定王百尺臺長安萬里目昔人思親心山川誰能局於
焉共登臨使我增感觸微霜隕陔蘭悲風撼庭木銀山
在何許白雲但空谷搔首重徘徊冥冥江樹綠

先民不可見懷哉金玉音士雖一命微愛物宜存心矧
茲園扉內白日變重陰求情筮楚下寃哉詎能禁嗶諤

漫弗省鬼神為悲吟子往莅其職朝夕惟欽欽祥刑勿
留獄斯語真良箴

遊鼓山

并序

六月二日偕潛夫參謀諸友遊鼓山飲湧泉亭明
旦登天風海濤坐白雲亭追懷昔遊愴然有感偶
成拙詩奉呈并簡住山明師

嚴宸有追詔趣上太守符疲民未蘇醒還顧空躊躇來
尋靈源盟喜與佳客俱始酌清泠泉一浣丹墨滄超然

煩溽中置身在冰壺遲明陟危亭雲濤渺空虛煙霏倏
開闔峰巒時有無偉哉此絕觀雄壓東南隅蒼崖萬仞
立四面環瓊琚翠木巧蔽虧亭午清陰敷令人澹忘歸
似到真華胥憶昨汎蓮日選勝邀朋徒摩挲巖上刻慨
仰趙與朱舉觴酌且盟一節期終初重來三十年恍如
隔朝晡並遊四五人存者獨老癯有懷子陳子感歎為
歎戲子抱明月終我方長途趨顛踣懼不免做省當何
如願言祝同社著力相攜扶禪伯亦可人新結峰頂廬

老我故勸遊軒冕非所娛會須脫鞵塵來依嬾瓚居

送吳定夫西歸三首

錄一首

世情重聲利榮途足趨走夫君獨何為經年闖林藪東
尋金壇翁南訪玉峰叟借問兩臞仙來時輕健否

杜範

戊辰冬和湯南萬韻

春初走京華秋杪歸舊廬簡編廢已久開卷澀且疎誰
能擊其蒙石田或可腴雁山有佳士讀盡天下書足跡

半九州不憚道里迂陋邦何足臨而亦來我居相從一
樽酒未厭園中蔬笑談欣有合浩若縱壑魚人生惟所
適所適各有途胸中苟不迷到處皆通衢簞瓢有真樂
顏氏何其懼沒沒嗟我生未知終焉圖論交須論心所
論在不渝願君示一語令我反三隅君無金玉音請誦
一束芻

丁丑別金壇劉漫塘七首

錄六首

黃綺避世翁萬乘輕商顏翻然為羽翼國本安泰山出

處義與比盛衰世相關懷古誦考槃令人欲長歎

崇山鬱嵯峩千章自交陰培塿植松柏斧斤日相尋物
小固不容名大亦難任智哉甯夫子其愚非本心

北風吹夏律草木塵沙昏枝葉曾未害根本難具論肉
食謀何有家食徒殷勤誰能起東山埽翳扶朝暾

川澤升為雨露然周四郊有水行地中溉灌亦良勞勢
力固有限夏哉加分毫為義分內耳誰言薄雲高

詞章道之華于世非少補施之非其宜文繡被泥土自

昔重立言一語萬鈞弩誰其厭來者是非實千古
女蘿去長松籍籍紛委地矇眊辭詔相十步九顛躓弱
味慙陋質先生未終棄再拜願有聞服膺敢失墜

送子謹叔二首

古道日凋敝人心競險薄風雨晦朝暮平陸變溝壑歸
來尋故廬六窗靜猶昨殷勤時拂拭埃塵易侵剝此地
寬且明休哉有餘樂

聚首日嬉戲胡乃遽言別回首十年間坐令肝膽裂東

陽古佳地先民有遺烈為我一問之山寒水清絕無以
持贈君高秋千里月

王埜

題虎丘壁

樂哉遊斯丘秋氣日以薄山從海外涌日向湖間落明
月見棲鳥遠風聞唳鶴平生夢泉石何能專一壑

戴復古

答婦詞

江山阻且長，矯首鄉關隔。空閨泣幼婦，顛顛失顏色。隱
閨鶴鳴篇，寄彼西飛翼。剝封覽情愫，既喜復淒惻。別時

梅始花，傷今食梅實。覽古帝王州，結交遊俠窟。千金沽
美酒，一飲連十日。春風吹酒醒，始知身是客。杜宇啼一
聲，行人淚橫臆。衣破誰與紉，髮垢孰與櫛。勿謂遊子心
而不念家室，新交握臂行，肝膽猶楚越。醜婦隔江山，千
里情弗絕。慙勤揮報章，歸計何時決。今夕知何夕，覩此
纖纖月。此月再圓時，門前候歸轍。

題古源崇和尚送青軒

南山色射窗北山光照戶道人處其中冰玉如肺腑茲
山自開闢荒翳幾年所一朝得主人荆榛化庭宇手披
風月藏目極煙霞趣居然獲竒觀人境賀相遇道人清
更高不作蔬筍語朝對北山吟暮對南山賦聞說玉堂
仙擊節賞佳句

久寓泉南待一故人消息桂隱諸葛如晦謂客
舍不可住借一園亭安下即事

寄跡小園中，豈不勝旅舍。俗事無交加，客身自閒暇。鄰家有酒沽，杯盤亦可借。吟侶適相過，新詩堪膾炙。足以慰我懷，留連日至夜。

寄跡小園中，新晴風日麗。好鳥竹間鳴，野鶴空中唳。悠然動詩興，行吟撫松檜。久客若忘歸，此身笑匏繫。五月倘未行，尚及食丹荔。

劉折父為子才索賦雲山燕居

燕居適所息，非懷傲世心。白雲自舒卷，青山無古今。中

有動靜機杳眇諧素襟以時為出處懷人撫瑤琴平生
披短褐時來或華簪世論倘不合矢口不如瘖避影長
松下洗耳清溪潄慎勿出雲外黃塵三尺深

感懷四首

錄三首

蛛網罨虛簷一飽羅羣飛寒蠶啣枯桑一身終繭絲物
物巧生理我生獨奚為貂裘日以敝石田歲嘗饑一貧
已到骨一氣倘未衰舉目送飛鴻悠悠知我誰

夜雨挾西風撼撼庭樹浮生堪幾秋青鬢忽已素鉛

刀剗九牛策蹇望長路所操莽無竒自好徒自誤改絃
調新聲履道易故步收功在桑榆其敢怨遲暮

紅紫委路塵綠樹有佳色剗心晚聞道翫物若有得青
春坐銷歇方茲見真實人生到中年胡不保明德秋風
隨庭梧棲鳳去無迹矯首碧雲端一語三歎息

松江舟中四首

錄二首

夜聽楓橋鐘曉汲松江水客行信息息少住亦可喜且
食鱖魚肥莫問鱸魚美

秋風吹客衣歸興浩難寫
寒林噪晚鴉紅日墮平野
篙師解人意艤棹酒旗下

戴昺

雜言

衆芳以春榮萬葉以秋肅
造物持其權兒戲恣翻覆
亭上松蕭蕭澗邊竹超然
榮肅中正色閱寒燠
提壺勸我飲布穀催我耕
我酒罇已罄我田草正生
荷鋤理荒穢及時新雨晴
秋來刈吾秫庶得兩遂情

逸翮凌丹霄潛鱗縱深壑天分安所適翔泳同一樂短
吟五七字薄酒三四酌浩氣與春風相從滿寥廓

待屏翁遊屏山分得水字

攜琴入空山修竹翠相倚一曲千古心泠泠寄流水拂
雲臥白石冥搜契玄理有時采薪人歌聲隔林起

秋日過屏山菴二首

淒切抱葉蟬間關棲樹禽入山本避喧復愛聆此音微
颺動夕爽薄雲散秋陰衆籟間以靜片月生東林

山泉清且甘漱之冷侵骨拂苔坐石上松風更蕭瑟悠
悠行空雲何心自出沒六鑿忽玲瓏吾計良未失

唐李涉有山中五無可奈何詩戲用其體作秋

日四首

無奈秋風何怒號震林木著我井上桐一夜失寒綠莫
作搖落悲妙理在觀復

無奈秋月何鍊魄金氣精炯炯一輪滿天地冰壺清照
我方寸景表裏同光明

無奈秋山何萬疊淺深碧起來樓上看朝爽浮几席稜
稜政自高更養靜壽德

無奈秋水何悠悠盪輕槳上下天一碧顛倒涵萬象願
從雙白鷗生涯寄浩蕩


御選宋詩卷二十二

謹案第三十三頁前五行重來三十來按下來字

疑訛

第三十七頁後二行平生披桓褐刊本桓作短今

改



總校官庶吉士臣侍朝

校對官檢討臣蕭九成

謄錄舉人臣李駟

欽定四庫全書薈要

集部

御選宋詩卷三十三

詳校官原任主事臣李斯咏

欽定四庫全書會要卷一萬八千三百三十

集部

御選宋詩卷二十三

五言古詩十四

嚴羽

登豫章城感懷



憂來不自得登城望高天
寒雲四面起朔氣下長川
脫劍且却坐君知心惘然
奈何平生志鬱抑江湖間
凜凜秋風來茫茫落日晚
長憂生白髮沉想忘朝飯
向來經

濟士本是碌碌人
蕭曹刀筆吏
樊灌屠販臣
徒步取勲業
漢道為光新
我今何為者
飄飄去鄉國
狂歌豫章城
醉卧風江碧
但取英雄笑
終慚倜儻生
名當以德載
事恥因人成
獨酌還獨酌
哀歌還寂寞
安得凌風翰
為君拂寥邈

山居即事

稍欣入林深
已覺煩慮屏
霜果垂秋山
歸禽度嵐嶺
紛紛葉易積
漠漠雲欲盛
澗底寂無人
松蘿窅然暝
惟聞

山鳥啼月上柴門靜終歲寡持醪延歡聊煮茗羣書北
窗下帙亂誰能整

豫章留別諸公

登艫眺海日涉島聽江猿何意豫章國還著孤蓬根經
過徐孺宅出入洪喬門昔看秋葉落今見荷花繁頗耽
山水趣正愜朋從溫窮秋催客去獨帆若雲奔追攀感
數子酒襟餘淚痕既傷歲月晚復戀煙霞樽歡樂無定
序聚散同朝昏丈夫志四海別離何足論

遊仙六首 錄四首

秋澗夜瑟瑟，月露明團團。
褰衣步澗月，忽見雙飛鸞。
上有騰空仙，天風飄珮環。
清歌映巖谷，粲若玉煉顏。
願昇綠雲去，隨君向仙關。
燕食長不老，何用思人間。

憶讀玲瓏篇，來往虛皇閣。
空見白芙蓉，秋風幾凋落。
昨逢紫陽君，共有丹臺約。
下視塵埃中，冠纓縛猿獍。
世事行若此，悠悠復何託。

五老出東南，崔嵬相間隔。
清晨登絕頂，處處仙人跡。
朱

霞散九光巖谷好顏色回首空澄湖黃濤正喧擊石上
絃素琴神歡心自清仙童三四人忽來左右聽嘹嘹誦
金書勸我餐瑤瓊贈我一玉麈邀我凌雲行舍琴與之
去恍惚在蓬瀛

朝別簡寂觀夜行石徑溪溪光照崖綠月色正相宜石
上三道士頎然好丰姿手弄金光草或把珊瑚枝憑風
招素手賜我一玉卮歎我事遠遊蕭颯朱顏衰長林孤
月落羽蓋何歲蕤童童乘之去棄我忽若遺明發聞無

觀但有青龜啼

巖翠

玉溪雪夜

雪霽天夜白月上江空
明飲散客就船萬籟沉
三更誰家竹籬岸模索
疎枝橫不著色與香
令我毛骨清醉魂乘
沆瀣看舞婆羅城

獨往

一徑歷紆餘獨往未到處
豈曰巖泉幽心間即真趣
蕭

蕭松有聲依依花自開
樵翁向我笑問我何從來

招提遊

幽尋愜所適
蘭若白石靜
天籟鳴松壑
古意滿苔徑
清泉醒客心
啼鳥喚僧定
留連不能去
翫月歸路永

煩抱忽如遺
僧境得清勝
花發巖洞幽
雲生窻戶冷
來驂樹陰直
歸棹川光暝
遺思山蒼蒼
半空聞夕磬

菊

寒林色枯槁
粲粲籬菊鮮
冷豔無俗韻
孤芳弄秋妍
金

晶與高潔未覺陽和偏豈無兒女花誰能制頽年

李昂英

酌別張子元

并序

子元已注今年班籍去臘余以言職免歸子元不待引見毅然相隨南還茲再入京送之至鑒空閣下用東坡韻酌別

南士如君幾妙處方寸境撐腸五千卷落筆擅三影喜談狂朱雲恥作諛谷永憂時點髭雪木肯疎鑷鏡摩挲

匣中龍起視斗牛耿每同畫灰語寒夜僮僕屏吾儕期
歲晏世俗任炎冷江亭揮別酒謔笑鬪機警景文兄弟
情畝異禾同穎日邊多便驛頻書來越嶺

是日至馬祖巖和前韻

九秋天地香贛產饒木犀登高詣其巔風健戲馬嘶偷
得一日閒古錦奚奴攜秋陽閣霏雨飛蓋換障泥舉揚
馬祖禪拂摩老坡題菊萸勸人飲猛吞玉東西凭闌視
九州莽蒼煙水低如何昌黎翁華嶺須縛梯野性淡無

嗜所樂惟山溪每羞名利區得失爭蟲雞意行契真趣
荒苔踏成蹊嘉辰且盡歡聚散或不齊

徐經孫

贈曾司戶

君家螺江頭我家劔江邊千載會相望飲水同一川
竭來古梅關相識春風前高義軋層漢清談響幽泉
努力效往哲勿為時俗牽

夜月赴都會歸輟轉不成寐觸事感懷

慶山高入雲章水清見骨山高晚宜梅水清寒浸月美人天一方雲煙眇空闊帶月簪梅花獨起舞殘雪

姚鏞

雜詩

北風日以勁古道無人行陽坡樹已黃陰崖草猶青四時相代謝誰為此枯榮攬衣坐幽磴下有流泉聲聽之不成調挹之有餘清悠悠京洛塵污人頭上纓

春館

山館四無鄰東風伴幽寂
鉗花羞晚紅庭草銜春碧
猿攀松樹枝鶴踏蒼苔色
麾之不肯去聽讀麻衣易

方岳

小集垂絲海棠下

春風定何物所至成芳妍
牆陰樹憔悴寧識歲月遷
今晨步吾屨珠纓粲紅鮮
餘醒不勝扶背面低晴煙
風日不貸人坐恐隨翩翩
強起從我游一笑俱嫣然

南窗偶書

西風忽悽厲皎月流素光客從何方來蘭佩芙蓉裳揮
瑟發哀彈夜寂山蒼蒼可人者麴生挽我無何鄉醉中
眇萬里拄頰歌滄浪

亨道至能對棋月下文振聞後堂歌聲逃席而
起

高梧動涼秋月色如新磨吾儕永雪胸如此良夜何二
客信不凡一局欲爛柯中庭人語寂玉佩鳴相摩勝士
何灑落俗子誰譏訶安得玉跳脫酌我金巨羅昭華不

露面獨繭抽長歌徑令鄭子真飛夢巫山阿

山行

山欲窈而深路欲繚而曲向來始開荒惟恐日不足松
行四五里雲撓上下谷振衣千仞岡邀月噴橫玉於今
曾幾何此興不可續一筇筋力疲籃筍或更僕平生愛
山心安得兩黃鵠昔如鴻翩翩今如駒局促盛衰固其
常細甚太倉粟付之琉璃黃澆以葡萄綠

次韻久雨

老我不解事束書別溪堂寧知十日雨換此兩鬢霜苔
滑蟻爭席雲蒸蝸篆梁移牀夜避濕仰見天隙光長安
亦何好肯墜聲利場人情愛吾廬對此良自傷早知一
官誤悔不三徑藏沙背竹萬箇屋頭木千章晴當相與
屐雨亦可以觴毋令鼃黽曹張皇喧我傍

八月十四夜對月

澄空四無雲明月如凝霜岸中南窗下領略今夕涼鷓
夷渴生塵風味不可忘欲上排九闕箋此世故忙百年

幾今夕令我持空觴竹君自可入清影飛度牆挹彼風
露姿浣此冰雪腸明當醅甕熟春溜翻糟牀良夜難虛
拘當復會此堂所不償予言有如明月光

簡劉尉

秋風昨夜起碧宇已澄穆肯乘雞棲車遠過蝸殼屋縱
無二頃秫亦有兩窗竹喜逢諫議面未負將軍腹燈寒
一夜話夢破十年讀貧味故自佳柔蔬雨中綠

與胡子安眺雲林

共搜括中竒邂逅瘦筇兩溪甘茶自香雪盡梅更爽硯
寒了佳娛林迴答幽響日暮僧不歸山雲自來往

酬行甫平山之約

我家江南邨煙雨對山睡與山幾何別塵土發深喟歐
陽有佳踐花驄一鞭至亟報江南雲共此故人醉

次韻楊先輩古調

陌上有蕩子金鞍飛華韉閨中有思婦玉指調悲絃當
時兩相得誤作容易看那知新婚別負此如花顏妾身

如秋葉君意如春煙恨妾不恨君勸君長加餐于飛者
雙燕人獨胡不然悲哉結交行難語之時賢

南山有於菟雪齒雙銅睛霧深忽軒髻孤嘯開青冥
林歲月老猶以文炳名胡為食牛志無復當時英吾聞
楊儀之筆落風雨驚乃今已老矣囊錦攜一兵平時號
詩將窮處圍愁城何當裁西崑與爾樽南溟高談動星
斗萬物皆欣榮秋風吾亦歸空山多月明

題王尉半竹

吾始過西齋破於玉川屋中有山澤癯雪燈共夜讀秋
聲入雨聽手移牆下竹攜鋤斲荒苔寧甘食無肉今春
初行鞭稍覺風月肅既成為詩喜破俸起新築舊聞君
家猷興寄尚幽獨一日無此君亦自憎面目君其幾代
孫秀色若可掬萬事不挂口脩然對寒玉城中寸金地
官舍迫林麓曾微百肘寬難雜以花木尚遺一半何留
之與雲宿

和放翁社日四首

錄二首

社鼓

夔夔粉榆社坎坎桑竹野初非有均度意欲薄幽雅侯
家按新聲視此寧勿赭且從羣兒嬉吾耒已可把

社酒

春風潑醅甕夜雨鳴糟牀相呼薦蠲潔洗盞方敢嘗不
辭醕酌紅所願穰稔黃家家飯牛肥歲歲浮蛆香

溪行

春風何時來柳色已如此山中不知年或告以于耜鳴

蓑起飯牛青青渺煙水獨有頭上霜春風不吾以
煙埋草堂路雨暗梅花邨起尋南溪翁隔此一水渾獨
酌固自佳業已攜山尊我醉即翁醉何必親與言

冬雪不到地春雪方連天山園赤珊瑚暄暖亦已妍舒
舒者丹萸忽作凍蝟拳寒燠固不齊勿與時爭先

避暑冷泉

火雲散鱗甲萬瓦如炊燭東華車馬塵襴襪不自禁誰
能半日間脫身此窺臨百錢買魚蓬橫截南北岑追隨

二三子未害山水淫邂逅十八公俱作笙鶴吟頗聞彼
上人振鬣萬馬瘖試詩沒字碑往聽無絃琴空堂無枯
秀契我回向心清涼一味禪揮玉開煩襟笑指亭下泉
杉竹涵幽深蘚橋放三閘龍怒飛出林奔雷吼春壑晴
雪生午陰人間正炎熱去作三日霖

利登

雜興

我昔此園遊寒梅吐孤豔重來幾何間叢青倏以遍誰

云花與葉同樹不相見

癸巳十一月二十五日辭家雪甚作愴然有懷
歲暮遊子歸余始為行客朔風萬里長吹雪犯巾幘臨
行不言苦不忍母心惻乾坤迫短景寒日易傾晁冰池
綠骨巉凍車瓊網澀一寒忍已熟浪出還自責撫劍睨
前岡雲重楚天黑

贈南豐

芳鮮桃李花畦奕春風道春風不可名桃李花自笑人

閒雙睫淨玉立軍峯峭

有口寧食薇有身寧衣褐居然觀八荒獨立招皓月清
風亦知人蕭蕭動幽樾

秋步述所見

趁晴收斷薪破曉循幽浦山寒樹欲風雲重天將雨兔
奔初種畦雞拾獲殘畝葉深樾無跡水落魚可數幽草
不須生千林秋已素

感興

寂寂卧空晝憂懷忽無端攬衣亂西澗復此凌西山春
事已無多半消霜霰間狂風更甚雨時蔽江南天寒草
昔衰靡及茲秀平阡日晚幽陽生餘光草中妍徘徊桃
李花瑟瑟漂寒煙

林希逸

舟泊姑蘇城外

倚郭維孤舟漠漠見煙渚水宿野鳥歸夜深鄰人語遠
客萬斛愁卧聽姑蘇雨

午齋即事

晴窗伊吾罷風薄清晝永陳編幾廢興適笑心自領青
精飯何味車笠沸塵境佇立共幽懷虛簷疎竹影

石鼎聯句圖

畫意不畫形形勝意不足正如九方臯相馬不相肉此
筆誰為之繅藉以錦玉一几共三人彌明喜師服賡酬
夜何其漏箭在銀燭誰如豕腹脹誰作龍頭縮始胡為
頡頏末胡為屈伏彼既鼻撩天避席徒局束去者俄翩

然二子睡正熟，夢戶問童奴。曉雲淒古木，質之昌黎篇。
段段皆實錄，用意豈不精。或者疑近俗，我聞文章家。同
工而異曲，或如駿歷險千里。在一蹙或寸步不遺，句句
必連屬。在詩則樂天，在文則永叔。畫品恐亦然，願言寶
此軸，毋使歎巧心受嗤於拙目。

劉翼

伯言見和拙作以漢隸書之謝以七韻

李潮善八分求歌杜陵叟有人和我詩半紙餘科斗風

雲生其懷劒戟出其手石經中郎蔡新樣元和柳元常
文不傳退之書何有待我農隙時載筆隨君後袖手眼
亦明聊與之飲酒

周弼

送覺新上人還越

古越多精藍名僧遞相接青林餅盃聚丹壑樓觀疊今
乘秋濤便莫待寒雨涉何處聞鳴蛩虛廊掃黃葉

錢時

十六渡

頗聞十六渡客子良間關一雨落澗谷湍氣怒潺潺我
來屬秋晚霜葉初爛斑窈窕行竹輿鳴禽相與間複嶺
互交鎖淺瀨隨回灣路斷一罅通石磴危躋攀時見荷
鋤者行歌語蠻蠻採山有薇蕨結廬有茅管安知避世
人不曾巢其間何時一枝筇溯流到黃山桃源事荒怪
誰謂非人寰

蜀阜精廬無風自涼方欣然出戶見竹雞將雛

砌外

簷蔔淨如洗，蒼筤清且深。
依巖自幽潤，况無日影侵。
亭午一升階，忽若投凌陰。
涼氣颯以入，肅肅生衣襟。
大火浮炎埃，虛堂抱雲林。
安得冰霜顏，聽我山中吟。
盤桓去未忍，砌外行山禽。
一母將四雛，出沒叢草陰。
我非有馴德，渠自無機心。
欣然歸北窗，載弄南風琴。

吳定夫遊武旌

九曲武旌山，山山堪著屐。
霜月叫孤猿，寒藤挂蒼壁。
路

逢採芝叟為我寄消息

周師成

梅

采采芳梅枝鎖碎白雲姿在山千花怨出山百鳥啼操
持思所寄轉趾迷所思清披太始風寒應太虛月一日
拂人衣三歲香不散

劉克莊

上巳與二客遊水月洞分韻得事字

勝踐造物慳貧交世情棄昔戒十客來旦無一人至惟
余暨兩君鼎足坐水次歡言天氣佳誰謂風土異高吟
雜騷選序酌逮髻雅滌厓去惡詩捫石認缺字古來幾
禩飲傳者纔一二蘭亭感慨多未了生死事杜陵更酸
辛窮眼眩珠翠旨哉茲日遊超然遺塵累逍遙千載後
尚有浴沂意巖扉滑如玉歲月可鐫識

龍隱洞

先賢評桂山推爾居第一豁然碧瑤戶夾似雙玉壁中

有無底淵黑浪常蕩瀟諒當剖判初倍費造化力雷噴
斧山開龍怒裂石出至今絕頂上千丈留尾脊寧論兒
女子壯夫股為慄我來欲題名腕弱墨不食摩挲狄李
碑文字尚簡質今人未知貴後代加寶惜湫流工駭舟
久遊覺蕭瑟巖室寬如家回櫂聊愒息

狄武襄平蠻碑
李師中待制宋

頌在
馬

陳起

靜江商宰書來且索鄙詩要道其冰雪相看之

意古調代書

連牆不通問千里乃寄音平生於締交淡泊味最深吳
山青插天應同碧玉簪尚憐風馬牛睽若商與參一聲
南來雁西風又相尋君其念衰朽余亦懷瑤林一簾了
官事吟外時鳴琴識量萬頃陂文華實南金向來唐相
環疑事問崔琳諸臺貴得賢而肯捨此琛會晤喜有期
寬此離索襟

李曾伯

庚戌過浯溪讀中興碑

浯山一何青浯水一何綠上有唐朝碑蒼崖與天直
清廟倣遺音靈武號實錄其筆走風雷其文貴金玉曾經
兩賢手足耀千載目後來紀名氏前鏡後且續豈無黃
絹詞中寓白圭讀一詞不敢措我懼此碑辱雖然勿泥
古詠歎豈不足嶽將降甫申吾皇車攻復將墨東海水
且汗南山竹勒功岱嵩頂豈曰清溪曲

姚勉

題雪景四畫

錄二首

寒江獨釣

殘蘆色欲乾，枯柳淅已集。彼舟者誰子，被此玉蓑笠。寒鱗正衣藻，垂餌安可及。此興不在魚，攜竿雪中立。

灞橋騎驢

飄飄風中雪，瀝瀝橋下水。雪寒換清骨，水淺漱塵耳。詩情散天壤，妙處乃在此。得句欲似誰，岸梅是知己。

訪胡景顏

適齋詩仙人吟境天寬廣聞詩未識面魚雁空來往道
周歛相遇慰此積歲仰煙林指深處邀我稅塵鞅入門
境自勝萬竹颯蕭爽燈前酌夜雨談笑劇撫掌錦囊出
新什句字兩俱響明當早脂車未別先悵惘嗟予走紅
塵方此墮世網羨君飽林壑四序足幽賞努力善自珍
清名照天壤

同張公望湖上避暑到四聖觀招柏堂月渾二
道士出飲

清晨有客來畏暑思避地涼多獨湖上一棹拍空翠長
堤舞楊柳餘雨在荷芰炎蒸俱已失滿抱足清意頗思
孤山頂有客具高致扣門聞琴聲便覺洗塵累湖邊出
問酒飲興隨所至池鮮煮珍甘水果剝香脆好風林外
來吹面涼不醉清談詣物表絕不挂世事畫舫何人斯
簫鼓正喧沸清遊彼應笑世事吾不嗜尚思攜枕簟同
叩竹間寺從今日日來莫厭驚晝睡

贈畫山水魚龍章秀才

章生畫中師神秀蟠心曾兒時學山水近復能魚龍拂
素欲畫時默吮南山松斯須景與物以次生筆鋒畫山

巧安排咫尺千萬重陰晴弄明晦近遠分淡濃雪月清
瘦嶼煙雨朦朧峯有時作江湖萬派俱朝宗雲濤洶澎
湃雪屋驚奔衝風平坦如掌皺殼浮溶溶因水更幻魚
回翻態從容翻荷猛跳珠聚藻相唼喁中有化龍鯉靜
伺機便逢天門露頭角滂靄祥雲從看君此四畫衆史
特奴傭當知各有意不特誇織穠丈夫抱膝時清樂山

水供觀魚或濠上笑倚臨流筇一朝稅鱗鬣屣脫塵泥
蹤甘霖澤四海霓望慰九農

麻子湖遇逆風

嘉平既望餘玉水發歸槳舟行苦灘濕三日葛陂上天
寒歲云晏道遠空惆悵行行且旬日僅此舟決潏順流
風忽逆進尺退或丈魚龜互出沒濤浪相涵蕩茫茫水
接天四望極空敞雖令歸思遲亦覺胸次廣是時羣魚
集軋軋亂輕榜紛來以十百並進或三兩懸金上絲綸

跳玉中魯網中間數十輩
蓑笠牽畫舫沿流勤按視
似是此湖長彼行良甚捷
此進不可強儻無觀魚樂
孰慰岑寂想篙師不告瘁
竒觀亦可賞黃昏成野泊
風雨助悽愴勢如潮汐來
怒若鞀鼓響吾獨安所適
幸不愧俯仰緬懷金蘭友
氣義特慨慷念我歸苦遲
舍我願先往亟趨南浦城
擇館待稅鞅今宵此風雨
露宿必草莽繼茲更三日
會面一拊掌屠酥酒同傾
共挹西山爽

白鶴

白鶴有奇質從古巢神仙饑餐必瑤草渴飲惟瓊泉朝
飛閬苑霞暮宿炎洲煙一從落塵埃六翮翦不全身居
樊籠中心往雲霄邊長鳴欲誰訴顧影私自憐清都夢
如昨欲去曾無緣安得支道林使之遂飄然

朱繼芳

滄浪風月

我登滄浪亭復歌滄浪曲歌竟復長歌杳杳山水綠天
風吹散髮山月照濯足為謝獨醒人漁家酒初熟

鄒登龍

詠懷

洪河相綿纏嘉宅良可卜蒼松蔭長蹊叢梅馥四屋過
亭白水飛鳴流漱寒玉遊目俯靈景抱杖委繁俗長吟
暢幽懷理琴展清曲豈不企凌厲而乃傷局促吉士抗
遐踪幽幽聚靈族

山上有白雲

山上有白雲浮陰翳陽光亭亭颯續紛出岫高飛翔飛

翔長在望遠匪千里隔莫以秋風來吹散無踪跡

秋夜懷菊山沈莊可

涼風動金旻奄忽寒節至百卉俱萎垂梧桐亦飄墜明月入我牖輾轉不能寐顧影重傷心思君長下淚

羅與之

玉梁道中雜詠 錄三首

清商從西來刺刺滿林塢草木儵變衰柯葉不相顧昔時翳空雲今作連山雨菊花猶強項籬邊爭媚媼

片石能邀人憇此兩足趺忽逢黃冠師對語白雲巖眼
中景物饒恨我蓬華遠躊躇不忍去泉石倘可剪

峭壁圍莽蒼荒谿人削跡時聞蘆葦叢野鳥語岑寂浮
生雖有涯幽討當無極御風獨長嘯此心謝鞿帶

俞桂

古意

無言情脉脉美人久相隔道阻修且長春草幾番碧鳳
釵冷髻雲鸞鏡輕雲幕昔為比翼鳥今作孤飛翮愁絕

寄郎衣腰瘦裁宜窄

靈隱

回首得兩年曾入靈隱去一路看不足衣霑松上露白
雲來相迎澗泉飛瀑素此景天下無遠勝廬山路

薛嵎

山居十首

錄六首

深澗遊羣魚高樹鳴幽禽山中白日長同此逍遙心脫
糲香可炊濁酒聊自斟過茲非所求孰為升與沉

陰壑生暮寒白雲如炊煙麋鹿不識人時復近我前青
松三四株石牀在其邊意思清且閒可以終餘年

前邨雨脚收斜陽挂高樹老翁牽牛歸頗亦有幽趣山
風響茅屋崖月導芒屨平生江湖心於此謝馳騫

龍居洞雲深飛泉瀉石壁不聞耳邊喧但覺心境寂富
貴由他人得失俱抱戚孰能全其天山中樗與櫟

午睡不覺長童子入城迴地爐散微煙煨芋已成灰獨
酌無嘉賓梅花為吾開須臾山月高顧影空徘徊

古調今誰彈至樂非外假淵明愛無絃此意知者寡放
鶴未歸來時倚長松下旁觀彼何人笑我衣裳野

黃大受

春日田家

凜寒陵熙春誰為禦其侮酸風吹積雪濃雲灑飛雨農
夫荷耒耜傲載耕斥鹵為其有身累寧免自辛苦妻兒
送中飯凍凌強欲吐晚歸極困倦倒睡帶泥土朝來天
光開紅紫新媚媪南園踏青人日暮猶歌舞

二月祭社時相呼過前林磨刀向猪羊穴地安釜鬻老
幼相後先再拜整衣襟釃酒卜环玦庶知神靈歆得吉
共稱好足慰今年心祭餘就廣坐不間富與貧所會雖
里閭亦有連親姻持殽相遺獻聊以通慇懃共說天氣
佳晴暖宜蠶春且願雨水勻秋熟還相親酒酣歸路喧
桑柘影在身傾歌半人扶大笑亦大嗔勿謂濁世中而
無義皇民

偶成

蕨薇生山巔長不踰蓬蒿松柏生澗底歲久還干霄稟
質自不同託身奚必高

綠草何自來蔓延滿中庭前朝方芟夷茲視忽已盈竹
間幽蘭花數四移乃成

公安

市人屋井底棟與江堤平大江壓堤來浩浩勢欲傾古
堤騰長蛇獨與江爭衡積流奔巨浸漂突萬馬驚油河
與之合盤渦沸湖騰折旋聲洶湧吞吸翻長鯨微茫隔

岸邨百尺崩沙潁中流有行舟來往如飛蠅巨風吹銀
山性命鴻毛輕設險護東南天巧如揭繩用武莫若荆
英雄所交爭玄德欲興劉於馬深經營坐據此要湍進
退窺敵情時事一扼塞拂衣開西局至今聞西偏城治
餘丘陵湯湯橫乎前何畏百萬兵善衛保其吭坐待其
師崩更能用吾長談笑收其羸何者非神機用之須人
英機略失所用山川無常形休兵不敢論淒咽含餘清

秋夜讀書

青燈敞虛堂微風動衣襟兀坐耽塵編起視星河沉古
人豈可見所希見其心終然發永歎不寐鳴牀琴

吳龍翰

連雪五日有無盡觀

平生酷愛雪老我看不足安得走五臺六月漱寒玉無
計巢雪山與佛結幽獨方輿多奇觀出門欠車轂天公
副微願連朝遣滕六寒林振琳琅朔風扇瓊木樓臺炯
夜光地靈驚玉局幻成銀世界一旦飽雙目清冷天地

氣吸人空洞腹脹欲呼夜舟飄然訪林麓

數年前有小詞云微雨後落花天嬌態病懨懨
怕人猜著是相思成日不開簾寶釵橫蟬鬢亂
院宇侍人歸盡緩移蓮步玉蘭前纖手掐花鈿
茲月夜與客飲梅花下一姝歌前詞復出箋徵

余新作

月夜梅花下開樽誰主賓梅花嬌欲語讓我白頭人娉
婷樓上女無乃花中神下樓欸歡笑莫惜拋千金纖纖

出素手為我彈瑤琴自言諳古調妾心合君心感君纏
綿意未彈先有情妾佩明月光妾衣雲霞輕共君驂白
鳳一息超玉京君看天帝女嫁與牽牛星天河萬里長
鵲橋歲一陳安得河水乾夜夜長相親君能挽天河一
洗八極塵

層翠樓

結樓書屋傍獨占林塘幽飛簷瞰寒碧照影虹霓浮層
巒萬蒼翠峭岫生戈矛黛眉與螺髻故故含嬌羞此時

樓中人片心隨白鷗
風吹烏紗帽露滴紫綺裘
白雲入我望逸興何悠悠
沆瀣供晨飧酌以碧玉甌
朝暾散朱景燕納十二樓
願言追黃鶴致身八極遊
慷慨笛聲發滿樓明月秋

張蘊

溪上

今夕知何夕吾意亦良適
明月滿船篷清風動帷席
過雨前溪渾停雲半空白
衰荷無嬌紅老梧有枯碧
頻更

燭對棋仍把酒澆石歲行變暄涼朋情慨離索相思日
以長孤吟夜方寂露下客衣單草際螢光奕年年修翫
心一醉不得惜

鄧林

南國有佳人

南國有佳人仙姿自蓬島龍綃照明璫鳳釵橫貴寶新
妝試鸞鏡皎皎顏色好芳年倏已笄君子可偕老奈何
行媒弱修言棄中道洞房閨悵悵玳瑁結組縞寧作鍾

離春勿學姑瑤草

結友四清

飄風吹游塵古道少人行
涇水化為泥滄江汙吾纓
嗟余侷工巧世外陶閒情
衆芳怨蕪穢不忍施萊盈
庾嶺姿皚皚渭川色青青
三閭播秋思九韶鏗樂聲
蕭然庭宇中對之成五清
滔滔揚波者劍首一吹輕
靈修儻見知冰霜憺媵名

李濤

詩友作涉江采芙蓉觸撥鄙思亦成一首

涉江采芙蓉江水濕我衣
厲揭不憚遠將以遺所思
所思不我見持此將安歸
野花逞姿媚衆好紛莫違
此物何足歎但傷愛者稀

黃文雷

晚立

獨遊得荒蹊晚意與心會
水聲遠纔聞山色靜可對
鳥語林塘邊犬吠籬落外
柴門未須關月在東峯背

陳鑒之

送鄭嚴州

父老迎使君舟楫桐江波那知使君心一片煙雨蓑杖
藜對客星清風雙嵯峩沙鷗公故人應為小婆婆

會稽秋日觀山

荒塍間流水蠹葉風颼颼前山與幽人亭亭共清秋遠
近日明晦隱見雲去留木末一叟歸犬鳴茅舍幽憶昔
典午東劔佩森名流勝地慰遠懷茲焉久綢繆漁磯與

樵徑今有斯人不池石老苔髮空餘羸蚌遊世有古今
異郢歌聊自酬醉眼時摩挲此山即前修

晚登京口倅廳富覽

窮途逢偉觀小閣江萬里薄暮岸幅巾寒煙四山起天
河注平淮斗柄卧蘆葦欲返還少留燈青客船尾

奉寄陳宗之兼簡敖臞翁

君隱萬人海嘯詠足勝流我墮寂寞濱嵌巖一筇秋蟠
鬱向誰吐天圍蘆荻洲劈箭客帆去何日回我舟

同劉叔泰放步湖邊入靈芝寺坐依光良久叔
泰誦坡仙好把西湖比西子之句予因賦古風

一首

劉郎喚我出勝處意所便清寒柳桃風濃淡衫檜煙僧
廬自生香步遶古佛前依光偶不局坐數禽聯翩平林
度清磬遙隄簇歸船湖山露真態鷗點溶溶天形容幾
吟筆剛道妝抹妍莫作西子看正如姑射仙相知喜值
予微笑生清漣

送陳仁叔之越

生世可無友我友得仁叔行已嚴尺度色夷氣清穆蠅
頭觀世態塵尾露心曲大江渺愁人風欲飽帆腹重陽
兩日是不共一杯菊吾儕跡浮萍同是客京轂作計俱
出此正爾未免俗倘有困可指一笑如魯肅寒窗共短
檠何用戒征軸所以窮杜陵恨欠突兀屋波寒淨沙石
露重老林木莫言衣帶水後會殊未卜越山君舊遊我
亦曾寄目邇來平安否細與問脩竹

陪守齋至玉湖書院作

天垂大溪碧近樹齋遠山水氣涵野色縹緲亭數間維
昔文節公孤標凜羣姦飄然兩屐齒雲巖遍躋攀此地
足佳致差不遠市闌壽峰

文節次子

顧而喜築屋娛親顏吳

興富臺榭往往攜歌鬟公獨抱書來小舟破潺湲花淡

水紋麗鳥啼人意閒讀易發妙蘊不惟平馬班

公有易訓馬班

異辭著述五百卷星芒照人寰天街幾繡鞍蹀躞趨豹闕

河來砥柱立一老旅蒲灣守齋

文節第四子今右曹郎中

領客遊秋

風韻枯管吾誦壁間文徙倚蘇石斑德人不可見月白
漁舟還

樂雷發

送綱齋李監丞赴湖南提舉

吏統久已紊使選匪易為蝎虺何蓊蓊鴻雁何累累持
節豈不多曠職苟所私緬懷紫陽翁昔使東浙湄陳臬
糾官邪揚仁蘇民疲茲道有先後哲儒昭令規綱齋宅
瀟牧邦懋灼帝知厲廉肅察察反稅驩鄉耆所學蘊淵

道寬嚴權理宜茲總全楚境歌此皇華詩位穹民言邈
壤廣吏蠹滋閩俗職所重簡僚乃政基視聽貴遠周細
微在可遺攬轡戒前路宜為好爵縻揆予忝英盼懷德
念別離別離果何念康濟乃所期懿茲遠大業肇此咨
度時勗哉振英采慰我湘民思

張至龍

寓興

東日照瓦霜西嚮界餘日莫言日不到日光來未及種

菊一百叢九月開盈枝莫言無好花好花開較遲庭前
無繁植疎竹附梅坡雖然無巨蔭明月飛來多夏月灌
菊根見花在秋日先時不施工臨花已何及十年插柳
枝今與高樹齊垂條綠春風上有流鶯啼

徐集孫

堅冰

滕六巧呈瑞平白一尺高霜風凜冽生挾夜聲如號冰
澌條玉筋瓦縫鏡銀膏茆屋頓暴富掩映何奢豪晶光

動閭里健羨等兒曹此時輕脆資堅為千載牢一旦陽
明升消泮葭纖毫奚獨此為然世事亦滔滔

夜雨

夜半倏驚覺狂風攪秋鳴掣電起迅雷驟雨翻盆傾逆
知造物意孳斂萬寶成天威不竟夕須臾山月明

王琮

秋夜有懷醉書十韻

秋風從何來颯颯入窗牖殘燈耿不寐照我容顏厚故

園豈不佳亦頗興懷否黃金桂百樹碧玉池十畝猿鶴
響空山亭臺映疎柳觥籌雜野菽筆硯得佳友愁無彈
鵲句雋有持螯手人生行樂耳功名有時有點檢屐幾
兩土苴米五斗浩然歸去來萬事不如酒

王柏

赤松即景

平生百慮懶尚有丘壑心佳哉二三友同盟時幽尋壯
懷豁虛曠玄宮窮邃深時方釀薄暑萬綠漲雲岑新篁

凝粉翠日影篩碎金瘦筇扶野步羽扇搖清吟漱齒掬
清泚雪瀑開風襟脫巾挂琪樹露頂涵重陰山禽自在
語濁醪自在斟物外轉棲碧石險蒼苔侵何時侶麋鹿
結茅入深林

和葉聖予小桃源韻

二仙何如人夫豈古隱士道成邈次寥羊卧不再起鸞
鶴舞松聲蕭騷快心耳金竈清塵生餘丹不輕委我來
桃源遊直窮路所止飛蘿搖春煙素雪噴清泚何時架

草堂深入此山裏，
脩然逃世慮。
鍊魄繼遐軌。

黃簡

招荆江蕩子

衝風逐飛雲，
庭葉紛墮槁。
蕩子久不歸，
佳人坐中老。
蕭蕭楚山晚，
湛湛江水流。
經從望夫石，
那得不回頭。

方逢辰

送潘翠谷

無屋住僧廬，
無菜挑野草。
野草風味長，
僧廬人跡少。

剝誰扣扃待予事幽討錢塘有騷翁自號翠谷老足馬
遊南牆要伴松竹好遐思到山人迂尋出詩藁詩無愁
苦吟埽退郊與鳥習次鮑明遠筆下王逸少我觀陰與
陽禪代何時了不能為魯連尚可作商皓長歌黍離篇
酌酒問旻昊

錢選

題浮玉山居圖

瞻彼南山岑白雲何翩翩下有幽棲人嘯歌樂徂年叢

石映清泚嘉木澹芳妍日月無終極陵谷從變遷神襟
軼寥廓興寄揮五絃塵影一以絕招隱奚足言

雪霽望弁山圖

城市吾所居遙看弁山雄積雪最先見皓彩照諸峯我
今遠城市薄遊留此中忽焉歲云暮更覺尊屢空開門
未然燭飛花舞迴風萬木同一縞四野變其容恨無登
山屐幽討何由窮

何夢桂

贈楊古澹

南山有岑樓岑樓高落星娟娟樓上女悠悠撫朱繩常
年猗蘭操翻作長短情世無千古人惟遺千古心心長
韻愈遠疏越難可聽曲盡無人聽月高風滿城

和徐權院唐佐見寄

白雲古樹杪下有山人家與君曾讀易探索入磐汙盤
桓坐白石汲泉燒鼎茶至今山中兒羨我兩客嘉客去
不復來屋上凝朝霞有時撫孤琴猿鶴聽無譁何當賦

招隱共駕青牛車

雪樓程御史次方山房韻見寄用韻答賦

青樓有蛾眉翳袖渺獨處日暮賦標梅愧我求彼士誰
家操孤鸞感此中夜起明河落天西玉繩低尺咫結言
藉媒勞恩重報無地明珠在羅襦誰能諒心事

次山房韻古意四首

思君吹參差幽路蹇離絕綠藍不盈襜芙蓉在木末采
蠶解我憂憂思難察識世態反覆手况復問宿昔鞫鷹

豈思颺轍鮒固相沫得時與失勢離附奚足惑耳餘難
為交管鮑易全德伐木無良朋白駒有佳客

佳人邈中洲倚竹翠袖寒捐玦屬蹇修脈脈一水間夜
半下雲旗逸駕歛可攀結言永為好失報念急難君有
金錯刀我媿白玉盤終然鹽梅心死不易醎酸往事化
蜩翼徂生遺鼠肝永言歲寒心寤辟起長歎

牽牛飲天河河水清可挹天孫無機杼終日不成織相
望空寤言無人諒心迹人生窘良會百年倏朝夕朝夕

不可期來世固罔極無金鑄鍾子鼓瑟逝安適帝子竚
不來采芳翳庭實悠悠萬古心俛仰三歎息

夜舟不藏壑川流無迴波百年逐憂樂晝夜相憂摩逝
者不復來皓首成蹉跎誰與傷鳳衰母乃楚狂歌茲世
固難免縱有朝與鮪猗蘭曲易彈祗恐聽者訛折揚雜
黃荅每與俚耳和感此歌晨風忘我將如何

方夔

田家四事

耕

古人以農仕仕即為公卿未仕有常業安得不躬耕我
耕常及時破塊當初晴墳墟土性異勤怠人力并泥塗
淤手足霧露沾裳纓婦子挈午餉勞苦寬我情罷耕亟
放牧吾牛亦飢鳴投耒重回首深山空月明

種

我生古揚州田下異梁雍山田種荒菜水田種浮葑地
力肥瘦兼農器有無共及時撒新穀搏黍遞幽哢生意

日夜長移秧趁芒種未嫌豚酒祝自樂雞黍供落日竹
枝歌猶是幽原頌

耘

良苗已入土田間水沄沄昨夜苗根發翳葉如煙雲草
生害我苗匝月一再耘是時人苦熱出門天未昕鬱蒸
體流膏爬捩手生皸手荼擁根節腰草驅蠅蚊青青稔
佩子從事哀我勤我勤自樂此爾非沮溺羣

獲

涼風入衣襟斜日照墟落我稼將登場築杵聲橐橐宵
征備寇盜日行呀鼠雀腰鎌赴田間是處竟秋穫刈疾
笑翁健負重慚兒弱山炊雜戎菽野草配場藿人生累
衣食計較一餉樂已矣復何言吾生老耕鑿

感興

斑斑林中雉雌雄同朝暉鼓翅飛不遠山田麥苗肥飲
啄百步間未暮相隨歸當春哺羣雛長大各自飛宇宙
豈不大嗟爾為生微窮途守一轍畢命芝與薇

月府有奇木根幹飽清露生香異凡間衝風落天路高
枝舞青鸞低枝弄霜兔姮娥方妙年衣采純縞素娉婷
不肯嫁含情待誰訴昨與汗漫期徑向銀河渡授我不
死藥倚徙怨遲暮即席欲服食終夕愁相誤悠悠下高
寒回首空煙霧

李謹思

寄進士熊退齋二首

猶存火後書罕識卷中字無筆補玄經有金匱載記漫

漫歲月馳忽忽春秋閱欲辨已忘言涕淚空垂泗
殉義若殉財避名如避箭况當喜懼交肯與寵辱踐百
年元亮心一日宣明面朱門轍迹多山路微如綫

梁棟

淵明攜酒圖

淵明無心雲纔出便歸岫東臯半頃秫所種不常有苦
恨無酒錢閒却持杯手今朝有一壺攜之訪親友惜無
好事人能消幾壺酒區區謀一醉豈望名不朽閒吟籬

下菊自傳門前柳試問劉寄奴還識此人否

送李北山歸建康

人生無百年胡為在遠道遊子歸故鄉王孫怨芳草有
田歸去來無田歸亦好

邵桂子

遣興

無家欲何為有酒亦竟醉况接故人歡譚諧起予意結
交三十年心事兩不貳坦率無町畦議論絕同異盆菊

傲晚黃泉蒲濯寒翠含芳自貞潔抱節誰嫵媚於人豈
不然巖壑從棄置守道苟有得安貧實易事山雲促還
歸溪月苦邀致去任任自然吾生等如寄

熊銖

題東坡詩集後

東坡真天人再拜當斂衽千古岷峩英浩氣發耿耿用
世固磊落作詩更雄騁熙寧化宜更當國惜已甚胡為
叫怒歎使我毛髮慄九天忠臣心欲發不暇忍雪堂何

從容人事得盡屏江山拓宵次風月動佳興我觀此時
詩下語已清永晚喫惠州飯晨夕對蔬筍和陶數十篇
習氣脫略盡岷山幾百阻到海渺萬頃公詩蓋三變每
變輒近正少年縱橫習豈意造此境偶於玄寂中佳處
得深省學道便為真此語吾敢信文固氣所充要在以
理勝洋洋大雅音千載歎寥泯言詩抑小技所入宜重
慎我詩難示人持此聊自警

春雨

春來一月雨米斗錢三千江空盡絕市竈冷廚無煙我
從莆城來四望良淒然濱海皆食淡邏卒相尋延累累
起夫役蔗局供熬煎玉食寧幾何千百俱並緣祇今二
月節何暇及種田使臣詢民瘼當務固有先近倉有陳
粟庶解朝夕懸州縣價一平鄉閭自然寬欲言事何限
何當息民肩

年嶽

題淵明圖

并序

淵明九日無酒坐宅邊菊叢中意殊寂寞江州刺史王茂弘諸孫已荷朝寄猶知有賦歸去來者能於此時遣白衣擔酒遠餉邂逅一醉大是奇事集中九日詩僅兩首無酒則曰塵爵恥虛罍寒花徒自榮有酒則曰何以稱此情濁酒且自陶而王弘所餉已酉九日十有餘年略不見於詩何邪此翁志節耿亮與秋俱高往往逃於酒而寓於菊二詩之作一感一喜微見於意固不暇於歲歲皆詩此

中有真意欲辨已忘言正當求之言句之外可也
此幅筆雖簡意有餘輒和己酉九日韻述其事醉
中看畫未免發千古一笑

平生抱耿介四海寡朋交淒其九日至頗感顏髮凋無
酒醒對菊風味乃更高誰識此時情白雲行遠霄地主
有佳餉得得良已勞而我適邂逅赴飲如沃焦永言大
化內朽質非所陶惟有飲美酒一醉可千朝

杜濬之

示故人

在家同苑繫遊子似箠飛昔分參與商今作埴與篴感
子意氣殊顧我齒髮非茅屋正蕭蕭野花亦離離無酒
水可飲無飯黍可炊杲杲看朝陽連連弄夕暉男兒重
交好雪霜以為期

錢仲鼎

題靜春堂集

閉門雪卧遠詠史風情留詩有三百篇令子手所裒汝

翁秀儒林殖學媿前修六經窮突奧萬象工雕鏤廣矣
雅音正悕矣騷情幽照耀明月珠珍重珊瑚鈎一讀令
人喜再讀令人愁李杜骨已朽江河名同流憶昔託末
契東城得追遊平時少契闊暇日多倡酬櫟材自揣劣
藻思誰與儔老我歲冉冉霜鬢風颼颼索居破茅屋寒
擁敝貂裘夜來清夢飛故繞松江頭夢中不識路修亭
渺悠悠粲然見梅花落月香影浮性情閱千古感發交
未休神交付冥冥知我雙白鷗

劉辰翁

初晴

初日入高樓歸雲雜江樹魚游新雨清鳥語晨光吐天
容起復覩煙色轉輕素牆草麗車前巷溝映泥路窗明
祛宿潤礎泣滑微步會朝有宿客過午無來屨沿砌上
蟻衣虛庭竿犢袴人生足無事世故非所慮彼語吾不
聞清風有時度

高晞遠

心遠堂

種竹期十年栽橘盈千頭雖云多遠慮無乃為身謀高
人絕塵累俟德居此丘泰宇無畦畛虛空有天游仁義
尚遠廬道德成安流結茅依翠微極目際平疇白雲度
寥廓黃鵠下滄洲百世此周覽我志尚可求祇應柴桑
翁真趣共悠悠

陳瀧

遊蔣山

蕭子香花場周子琴書地峻坂接縈紆高林在蒼翠驅
車登北阜樂此風日媚遠挹秦淮清近覩吳宮麗休懷
國峙三猶見山維四巖空猿鹿遊谷響橡栗墜石獸土
漫沒碣龜苔鼎扇昔人事觀覽驂騑屢連轡往迹付荒
蕪白雲鎖幽閉雙鶴鳴夕陽吾亦動歸志

御選宋詩卷二十三

謹案第二十二頁後四行輾轉不能寐刊本輾訛
展今改

第三十七頁前四行疏越難可聽刊本聽作聞據
何夢桂潛齋集改



總校官庶吉士 臣 侍 朝

校對官檢討 臣 蕭九成

謄錄舉人 臣 李 駟